

Pfannehouer Fasnacht Thun 2019

Grüessech mittenand, also, wi Dihr scho ghört heit, mir si ds Duo Make News u mache Comedy, so uf Gag, aber nid nume.

Mir trainiere nämlech mit dene Uftritte für üse Iischtig i d Politik, u mit de Täxte tue mer so chli usteschte,
wie witt mer chöi gah bim Wahlvolk, was so dinneligt, was si gärn ghøre, was no grad so gschlückt wird.

Jitz, während der Fasnacht, mache mer uf Schnitzelbankgruppe, mit Schminki u so, fallt weniger uuf.

Öich chöi mer das ja säge, öb Dihr das gloubet oder nid, isch üs gliich, dihr wärdet ja nid grad düreträjje.

U mir tue s so oder so dürezieh, hütt i de Beize rund um ds Rathuus, glli mal im Rathuus inne, nach de Wahle de im Bundeshuus.

D Wahl-Schpände flesse, wüll d Wirtschaft weiss, was si a üs hett, und üsi facebook- und influencer-Maschinerie louft rund.

Ja, de chöi mer gloub aafah. Mini Dame u Herre: Pfannehouer, Thuner Fasnacht 2019.

Als Erschts grad dr Farbtescht. Chöi mer sofort abschete, mit wäm mir s z tue hei hie inn.

D Thuner Stadtrats-Ample lüchte küehn nume no gliich lang rot wi gruen

S hett chli meh Blassgrünen-Schimmer drin, gälb wird's no hennechurz zwüschnin

Dr mittler Sitz ir Füfer-Horde wär um n es Haar ganz farbfrei worde

verblasst bi BD-FDP d Brillanz, verbesserset sech d SVP-Bi-Lanz

Und dass d BDP muess darbe, isch logisch: z Thun - mit YB-Farbe

*

Ja, es hett so sini Nase mit de Farbe:

Rekord bi NEZ ROUGE Switzerländ / Aber: minus 10 Prozänt im Bärner Oberländ

I gloub i weiss, wi das isch gloffe, / d Bärner hei halt weniger - Beize n offe

Eis Prozänt chunnt ganz beschtimmt, wüll dr Lanz beschwingt gäng ds Velo nimmt /

ds Velo rot, u rot dr Helm / Wär da rot gseht, isch e Schelm

*

Bim Vignette ab dr Schibe chnuble wär i fasch z schpät cho zum Iichüble

Dr Obergring, für d Lütt z begrüesse, hett uf ds Rathaus-Fänschterbrätt usemüsses

O wenn er schiints bim Usehisse e Druckpapierschacht heigi gschlissee, wett i dä Muet doch nid vermissee:

Ke andre Thuner Ratsherr, s'isch z erwähne, würd sech esoo witt usem Fänschter lähne !

*

Zwüschnrii eine über mi sälber, PR-psychologisch nid schlächt, we me di angere i d Pfanne hout

I ha i Oeko inveschtiert / Drüfachverglasig, ds Dach saniert, nach Gebäudeprogramm isoliert

dr Wintergarte winddicht gmacht, u d Heizig ufe top-Stand bbracht.

Nach so viil Chrampf muesch Ferie ha, / itz flüg' i paar Täg uf Südafrika.

*

(Bi däm Bank geit s nid um dä truurig Poschtoutobrand vo Chur ! s gitt gnue angers zu däm Thema)

Dü-Da-Do, o-o-o ... / Si hei üs d'Illusione gno / Ou dr Ersatzton macht nid froh / Wüll si hett nume

"Tüü-tüü-tüüt hett si gseit, süsch nüüt hett si gseit, tüü-tüüt"

*

Zwibele säget s z Bern für Böle / s Pütschee sind französisch d Chöle

Für all Schwiizer, wo usserhalb Züri müend wohne / prichtet srf bräät ääu us de Regione

"Tamedia, Grüezi. Was ? -- Aha, Sie wänd de Tuuner Tegu haa ?" Gällezi: So Lüüt bruucht s halt äu !

*

Keni Hornchüeh ! Palmöl importiere ! / Bürgerchrieg mit Schwizer Waffe füehre

Lachnummere zum Tag der Kranken / Herr Schneider-Ammann, tschüss, wir danken

Export-Choral für Munition: Syrie eleison. Ja d Schwiz isch wahrhaft wehrhaft als Nation, z Mitholz e wahri Deto-Nation

*

Als Symbol isch das grandios / dr Trump isch nid am WEF z Davos

Wägem shutdown chunnt är nid cho z pfure / eigentlech shut up: är hockt uf d Schnure

Damit dä nid chunnt, 's isch der Hit / längt e Muur, wo s gar nid gitt

Die Muur, seit Trump, wird topplet nütze: Si wird ou üses Klima schütze /

wüll vo hindedranne, da'sch dr Grund, dr Hurrikan u ds heisse Wätter chunnt

und nimmt üs d Chelti fasch dr Schnuuf, tue mer d Muur es Schpältli uuf

*

Plakat: Die Glorreichen Sieben - nei, bisch im fältsche Film, chehre, Rückseite: Die Glencorereichen Sieben

Gitt s en Unterschiid - i frage das ärnschthaft - / zwüsche Schwäfeldioxid und Cassis-Saft ? /

Es gitt ne, es isch ömu z hoffe, / im Momänt isch ds Resultat no offe

S gitt no ne zwöite Unterschiid: Ignorazio heisst er nid

Was dä so bhauptet, s isch nid z fasse - aber s würd i üse Wahlkampf passe

*

Blibe mer grad bim Thema: Jedes Jahr es Bundesratsföti. Was hett ächt dä Muurer wölle mit sim Smartphone üs verzölle ?

Bevor er schtill abzöttelet (clicke Di, clicke da) / hett dr Muurer ds Volk abgföttelet (clickeidi-eida)

Er findet drumm niemer, tüet nid lache, / wo wett mit ihm es Selfie mache

Itz cha n er wäg de Saudis, himuguege, / sowiso am Volk nümm grad i d Ouge luege

*

D Sozialhilf zahlt pro Tag e Schnägg - / fünf Schutz - für ds Ässe, Räsch fallt wägg

dr Schnegg hett gseit, dass das scho gieng - / viil besser gieng s, wenn är scho gieng !

E Schnägg: zum Schlangefrass versüesse - oder am Schilthorn nid i d Schlange z müesse

*

Itz wird s kompläx - und hochdeutsch

Solang die einen vom *Rahmenabkommen* / nichts als den *Rahmen abbekommen*
Während and're zum *Abrahmen kommen* / können die sich das *Abkommen rahmen*
(und man wird vom *Abkommen abkommen*)

*Z'underscht chocht s, mir sötte lehre: Gälbi Weste cha me chehre
die z'oberscht chönnte hälfte chehre, wüll Grächtigkeit, das chönnt me lehre*
*

Und jitz üse Bundesbärn-Politverschnitt im Schnällgang:

Wär hütt no **6-Spur-Outobahne** / als Lösig vom Problem wott plane /
dä sötti gloub' für settig Sache / mal e **Gwüssensprüefig** mache
*Für Zivildienscht d Gwüssensprüefig "gniesse" / ohni Prüefig lehre Lütt erschiesse /
dr Amstutz findet Zivis schitter - är geit, d Weich-Eier chrampe witter.*
S'isch **Wahljahr**, jede bringt ds Rezäpt / wi me d **Gsundheits-Chöschte-Fluet** ufhäbt /
Fählt no ds Rezäpt, wo so verhäbt / dass es d Rezäpt-Fluet überläbt.
Ja, d **Zwöit-Wohnigs-Initiative** hett griffe / hett mänge Hüslitroum abgschliffe
Itz hei mer halt die Dränglerei / wüll alli **z Bärn i ds Schtöckli** wei.

*U de die im Nationalrat: Am CO-2-Gsetz, wüll s kommod isch, / desumepaggle, bis es tot isch /
und üs mit ihrem Lächle quäle / und mir sölle se de wider wähle ... tüet gschider üs vo Make News wähle !*
*

*Mir fahre besser zrügg uf Thun, dert hett's keni Nationalrärt
Es fahrt e Zug vo Bärn nach Thun u hudlet wi ne Moore
D Zwöisimmner hudlet s hinger inn, die nach Brig erhudlet s vore
Je nu, mir müesse dankbar sii u gliich chli Fröid ha dranne:
Solang er hudlet, fahrt er no - bis zur nächschte Panne
Di näie Doppuschtöcker, o herrjeh, chöme n ou vom Bombardier*
*

*U hie no üse Regional-Ladehüeter, Laden-abe-hüeter:
O Hallebad, o Hallebad, o Hallebad, o Hallebad, o Hallebad / öb die s jitz äntlech schnalle, Bad ?*
*

*Dadmit chöme mer zum Schluss, wüll: Zum Schlossbärgparking hei mer nütt, dert hett s scho ohni üüs gnue Lütt / hingäge ds Ethik-
Forum verpasst zum Schluss sis Quorum / Für nid i ds Filosofische n abzschweife, inveschiert me z Thun i Beton, Bläch und Reife*
*

Löh mer das, hie chunnt ds Schlussbouquet, gnauer gseit ds

Schluss - Boccherinuet

*Es hett emal es Liedli ggäh: "Dunde n ufem Bahnhof schteit en Outomat, u we me de dert es Zwänzgi abelaht,
träije Tanzfigürl, ..." D Melodie isch ds berühmte Boccherini-Minuet, ds Bouquet si ehnder Ver-Schnittblueme*

Z Thun hinderem Bahnhof schteit e Böss parat
Muesch usgrächnet dä näh, de chunnsch öppe z schpat
Wie nes Tanzfigürl / träjhsc es Äxtratüürli / rennsch dür d Rampe n uuf - dert fahrt er grad
Heilandtonnerwätter / bi däm Hudelwätter / schtatt deheime z plätt're / sone Seeleschmätter
Und bir Haltschtell Poschtbrügg chunnt er gar nid verbii - hihihihihih
und wär blöderwiis i ds Bälliz muess, ja dä geit sowiso gschider z Fuess
Und söttisch einisch öppis schwärs zum Schleipfe ha, muesch i n es Lädeli im Heimbärg gah

Z Thun hinderem Bahnhof schteit e Böss parat
Mischlet mächtig mit i däm Verchehrssalat - und dr Gmeindrat findt das gar nid schad !
S wär no schädener / meint dr Hädener / wäg paar Wuche n öppis nöis aazfah
Wüll wenn s warm wird, geit s grad wider los: Bouerei, Souerei, Lärmerei
und das permanänte Gchäär mit däne vor Verchehrspolizei
Und hesch dä läschtig Umwäg äntlech glehrt, isch dä ab nächschte Mäntig wider gscherpert

Plötzlech unerwartet itz gliich wider vor u nümme hin'drem Bahnhof schteit e Böss parat
D Frag isch, wär hie wän am Seili abelaht
Wär si d Tanzfigürl / Wär zieht wän am Schnürli / Wär hett ächt wi lang wi viil Rückgrat ?
Lue dä Riise-Mais u- / me Muulbeerli-Kreisu, / und mir graut s scho vor / em Puff bim Lauitor

Irgendwenn und irgendwo rund ume Bahnhof schteit e Böss parat
Bevor Dir das ändgültig ufe Mage schlaht,
Dank dra, i paar Jährli / chunnt e gschide Kärl / und faht mittem nächschte Bypass aa !
No ne Mitteilig: Morn z Nacht fahre zuesätzlechi Nachtbösse, Moonliner, Abfahrt ab Bahnhof Thun. Schöni Fasnacht !